



aandere kaant'. 'Moi, doot mij efkes ne zaklanteern, dan goa'k now in de kast stoan en dan wi'k wal es zeen wat der an dee kast schealt', zegt Teun. Good, zeg Marie, 'dan goa'k now eaven noar benee um de earapel of te geten dee'k op 't gas heb stoan'.

Net as Marie gängs is in

de kökkn, koomp Gerrad de slager thoes en zöt de vuurduur los stoan. Hee löp de hal in, zöt wat verpakingsrommel liggen en deankt: 'Oh, dat zal vaste van de nije kaste wean en geet beniejd de trap op. Geet de sloapkamer in en tukkert goodkurend vuur de nije kast. 'Bes ne roeme kast', deankt hee, döt de kastduur lös en schrikt zik bije-noa ne brök as hee Teun in de kast zöt stoan.

'Wel verduveld Teun, wat mut iej in godsnaam hier in de kast bije oens op de sloapkamer?' 'Joa Gerrad', zeg Teun: 'Iej könt 't geleuven of nich, ik stoa hier op 'n trein te wochen!!!'

Bovenstaand op deze pagina behoort niet tot dit artikel

Greansgevallen

Johan Kwast

Pöale door bint der nen hoop van. Nemt noe de hoolten wearepöale, schier in 't gelid, krammen in de hoed, nen droad der langs en kloar is 't gleendweark.

Op de heuke steet nen hookpoal. De schoorpöale deent vuur ondersteuning. Donateurs, dat bint ok schoorpöale. Bowpercelen zet 't Kedaster oet. Ze broekt rood-witte piketpöalkes.

Nen poalbörgar is nich nen poal mear ene den binnen den stadsgreanzen wont. An ne grenze steet vaak enen loakpoal. Met ne greanscorrectie schoewt ze de pöale op.

De greune grenze keant gin pöale. Doar sliedt ze zo ongezeen 'n poal oawer.

Amsterdammertjes bint tapse pöalkes in Mokum. Meest vuur 'n sier stoat dee doar.

Vuur fietsepöalkes möj oe waren.

Zee'j op 'n voetbalveld twee lange pöale met ne lat der oawer? Doar möt ze 'n bal tuskenduur zeen te wearken. Lukt dat, dan roopt ze "gool".

Nen greansrechter heult de ziedliene in de gaten en vlagt vuur boetenspel.

Greansrivieren he'j ok. 'n lessel en de Reest bint der vuurbeelden van.

Nen greansjager was nen rieksveeldwachter.

De greansstreng is ne zenuwbaane an wiers kaanten van 'n ruggenstraank.

Oale vakwearkhuuze en 'n loshoes stoat lös. De dakgebeenten röst op 't geboont.

Schaampstene bint et behoold vuur de muren nöast 'n nienduur.

Nen slagboom is ok nen poal. Doarachter he'j niks te zeuken.

Jachpöale, grote stenen pöale, dee begreanst de

jachgrond. Op grond van laandgood Twickel in Ambt-Deelden, doar stoat ze.

Laandweren bint natuurlijke verdedigingswearken tegen water en vee. De waterlinie behodt oons laand tegen völker dee ons op 'n jas wilt.

Nen toen is de umheining um oewen goarden.

Greanzen verleggen gif 't ok. Zölfs noar de moan wilt ze. Wat leu möt der lopende hen.

Bloas ie 'n lesten oadem oet, goa'j de leawensgreanze oawer, dan kom ie "oet de tied".

Bije greanskwesties geet et um 't miene en 't diene.

Weark vuur "De Rijdende Rechter".

Löpt 't oe oawer de köarve, dan he'j te völ an 'n kop.

Met 'n kot lontje kö 'j weanig velen.

Deank ie wieder te springen van 'n polsstok laank is? 't Wil oe kullen.

Hool ie 't der oawer hen, dan he'j nich good 'e richt.

Geet der ene vrömd, dan vret-e oonder 'n droad hen.

As 't oe anbraand is, dan he'j de tied verzetten.

"Goat hen en bettert oe!"

Greansbal is 'n keenderspel met ne achterliene.

Kaatsers neumt dat de boawenliene. Sloat ze 't bälleke met enen klap oawer dee greanze dan maakt ze ne 'boppeslag'.

Weeldplassen mag ok al nich meer. Wat doo'j a'j plastebletten sloekt? Ie kuiert woareargens boetenof en ie möt zo neurig. Stoandebeens of op de hoeke, pissen dat doo'j.

Oasen is zwoar wearken of, an de weend stoan.

Alns hef zo zien eande, mear ne wos hef der twee.

Der is ne tied van kommen en ne tied van goan. Dee greanze gealdt ok vuur mij. Ik doo der zovöl bije en zet der ne peunt achter●